


يہکن تڪونني ساكنة جوايا



مصطفى التركي

يمكن تكوين ساكنة جوايا

مصطفى التركي

باكتب واقول:

سائل كاني.. اتدلفت من القزازه  
زئبق لكني لا ازول.

باكتب وياشرح:

إزاي خرجت من القزازه، وفي القلوب  
مالقيتش مطرح.

باكتب واغني:

قاعد باجدد شكل شعري، ومحتواه  
ضحيت كثير علشان ألاقي للميت دواه  
قلبي كواه كتر التمني

تسألني قصدك إيه؟

بتكتب إيه؟

وفين ال آه؟

لغزت حرفي ودورك انت

تشوفلي فين معناه!

باكتب وباغزل لبسي بحروفي  
لا كلامي زي الشرنقة كلي تغطيني  
ولا شفاف يعريني  
باينة الملامح، ومختفي خوفي  
باكتب وباغزل لبسي بحروفي

أنا شيء هلامي

وشخص بارد

مش كويس

أنا في المواصلة بقيت بانام

أنا جوا أوضتي أكيد بانام

أنا نفسي أبدأ يومي حلو

واول يخلص أقول تمام

أنا مصطفى

ومش مصطفى

أنا أيوة شاعر

بس نور شمسي انطفى

تقدر تشوفني أي حد

أي واحدة وأي واحد

حتى شوف

شعري جميل  
وعيونى حلوة  
بشرتي بيضا  
وطولي متوسط  
فلاحة باتمدن  
أمى قالتلى إمتى نفرح بيكي قلت  
هجيب عريس  
حوّرت واتحوّرت واتغيّرت  
ماعرفتش أقيس  
طبع البشر  
حطوا علامة عند بعض الناس وقولوا  
حاسب خطر  
حاسب خطر

جسمي ضعيف

عودي نحيف

لما بابوسه يبيعد

أمي بعيد

وأبويا برضو بعيد

وعيون عليا بتجلد

سلمت جسمي للي رايح واللي جاي

حسست ميت إنه حي

وانا مين يحسسنني بأنوثتي؟

جسمي عرضته

جسم حلو

يسرّ عينك

ريقي سكر دوقه عندي

وعندك انت اسقيني عينك

مش عايزة غير

مش عارفة عايزة إيه النهاردة

مش مهم



مابقولش جسمي  
هدومي مظبوطة وهادية  
تشوفني تحترم اللي جابني  
كلي ذوق  
وأدب  
وحشمة

ما بقولش رجالة

بقول السيدات

السيدات

السيدات

أنا مصطفى

شاعر صحيح

مع إن نور شمسي انطفى

اسمعي واسمعهم

إحنا غلابة

أوع الأقل اللحظة دي إحنا غلابة!

اللحظة دي بالذات باعيط والدموع بتسيل في صدري

عمال أجل كل حاجة وكنت فاكر لسه بدري

الناس بتجري ونفسي أجري

يا مين يحب الشعر واكتب ليه بأجر

يا مين يشيل النملة من راسي

أمي يا طرف الشال عليا  
مدي إيديكي مش لاقى إيديا  
أمي حنانك لما ضاع  
ضيعت كل كرامتي علشان ألقى مثيل  
واقف ومادد إيدي باشحت م البنات  
(قلبي عليل.. لو مش حتضنوا قلبي ده.. هاتوا بديل)  
أمي تعبت  
وعايز انام

والدي يا ضهري  
مستغرب الصمت اللي فيا  
قهرة ف سكوتي متدارية  
تظهر في عز الليل في سهري  
والدي يا ضهري  
كان نفسي أبقى باش مهندس، أبقى دكتور  
حاجة يعني.. بس انا  
سلّمت أمري  
للمشاعر...

باعرف أقول

واعرف ما اقولش

وامشي على الشوك من سكات

وازرع نبات يطرح نبات

الحمد لله ع الكتابة

والخيال

من غيرهم اللي مش لاقية بالاقية بسرعة

ف أبهى صورة ولون

وبأحلى ريحة وطعم

ياما اترميت في الشمس

واتخيلت ضلة

ياما يا قلبي سقيت ورود حمرا

ياما يا روعي مالقيناش شبيهك

لكن رسمنا اللي يستاهلك

وقعدنا نشرب شاي مع التوتة

إحنا اللي ربنا جابنا هذي الأرض

نروي لصغار البشر

كل اللي كان م البشر

حدوتة حدوتة

أنا باكتب الأشعار دي وأنا في المواصلة  
علشان معايا ف جعبتي أسرار كثير  
وعشان بحاول أمسك النجمة واطير

زي الشهاب

خبط عليا الباب

قولتله

عايز إيد بني آدم تخبّط

وحضني طيفها رميته في حيز أثيري

قولتله فين حضنها؟

بوست الشجر

أبوة

صحيح

بوسته

علشان شجر ده جمع

وشجرة مفرد

يبقى انا بوست البنات

بوست البنات!

مرتاح عشان بطلت أوصف اكتبابي

مبسوط عشان مابقولش كلمة

منك كتبت بعث ليا جوابي

وف قلبي حاطط إيدي باجس

يمكن تكوني عايشة جوايا

وامّا أشوفك احسّ



ليا وشوش ياما  
بحاول أبقى وش  
لو قومتي يا قيامة  
هقابله بأنهي وش  
وأنا باحبه باعبده  
يارب عبدك اهو حبيبك  
مش عارف اغشّ!

قربت أرجع بيتنا  
نفسى أهيم  
أمشي على سهم ف خيالي  
ما ارجعش أوضتي  
عايز أقابل كل شجرة احضنها  
أنا لو رجعت الأوضة الطيف هيحضني  
والباب يخبط  
والوشوش تكثر حواليا  
قتلوني والا قتلتم  
طب هي فين؟  
فيه دم في إيديا!

الحساب الشخصي على فيسبوك:

<https://www.facebook.com/mostafa.eltorky.5>

0767